


TEZAUUR LITURGIC
8 NOIEMBRIE/26 MARTIE
13 IULIE/11 IUNIE

ACATISTUL
SF. ARHANGHEL
GAVRIIL
IV



MOSCOVA, 2000



Акафист

Архангелу Божию Гавриилу

КОНДАК 1

Избраннаго благовестника спасения нашего,
великаго слугу Божию и к Пречистой Деве
Марии радостнаго посланника Гавриила
Архангела восхваляем песньми и благохваленъми
сими. Ты же, яко предстояй Престолу Царя
Славы, от всяких нас бед и скорбныхъ обстояний
свобождай да с верою и любовью в похвалу тебе
зовем:

Радуйся, великий Архангеле Божий Гаврииле.

ИКОС 1

Ангела предстателя, провозвестника Таин
Божиихъ дивнаго, чуднаго Гавриила,
Архистратига Силъ безплотныхъ восхвалимъ ныне,
во умилении глубокоемъ припадающе и вопиюще:
Радуйся, благовестниче чудный спасения
нашего.

Радуйся, Таин Божиихъ славный провозвестниче.

Радуйся, Божиихъ велений исполнителю.

Радуйся, спасения рода человеческого усердный
служителю.

Радуйся, вернымъ радость от Престола

Вседержителя износящий.

Радуйся, неверных на стезю правды и истины приводящий.

Радуйся, великий Архангеле Божий Гаврииле.

КОНДАК 2

Видяще тя, великий слуго Божественныя Премудрости, усерднейшаго ходатая и скоропредстательнейшаго помощника всем в нуждах и обстояниих сущим, радостно о тебе зываем Богу: Аллилуиа.

ИКОС 2

Разума Божественнаго ты еси податель,
Богомудре Гаврииле, ибо благодать сия дадеся
ти от Предвечныя Премудрости Божия. Темже и
нам, грешным, погрязшим в суете века сего,
даждь от Божественныя Премудрости во ум и
сердце наше свет истиннаго разума Божия,
зывающим ти сицевая:

Радуйся, разума Божественнаго
щедродательный подателю.

Радуйся, первый книгописания рода
человеческаго мудрый учителю.

Радуйся, пророку Моисею премудрость
Божественную открывый.

Радуйся, сказавый ему миробытия начало.

Радуйся, создание перваго человека Адама, и

житие онаго, и по нем бывших возвестивший.
Радуйся, и вся последующая лета и роды, о
потопе и разделении языков, племен и народов
сказавый.

Радуйся, великий Архангеле Божий Гаврииле.

КОНДАК 3

Силою Вышняго препоясанный и ею предивно
укрепленный предстоиши Господу Твоему денно
и ношно, немолчно взывая Ему песнь: Аллилуиа.

ИКОС 3

Имать тебе, Архангеле Гаврииле, весь род
христианский велика помощника, и благих
советов подателя, и в недоумениях
пребывающим дивнаго наставника,
похваляющим тя тако:

Радуйся, пророку Даниилу истолковавый дивная
видения о царех и царствах послежде быти
имеющих, образованных различными зверьми.

Радуйся, известивый ему о освобождении людей
Божиих от Вавилонскаго пленения.

Радуйся, ему же открывый о времени Христова
в мир перваго пришествия.

Радуйся, благовестивый ему о воплощении Сына
Божия от Девы Марии.

Радуйся, пророков премудрый вестниче.

Радуйся, всех христиан ко благу учителю.

Радуйся, великий Архангеле Божий Гаврииле.

КОНДАК 4

Бурею сомнения, печали и уныния одержима
баше Святая праведная Анна, егда скорбаше о
неплодии и со слезами моляшеся в своем
вертограде. Ты же, Божиим велением, явлься
пред нею, возвестих ей глаголя: «Анно, Анно!
Услышаны есть молитвы твоя, и воздыхания
проидоша облаки, слезы же твоя пред Богом
взыдоша, и се зачнеши, и родиши Дщерь
Преблагословенную, о Нейже возблагодарятся
вся колена земная, и Тою дастся спасение миру,
наречется же имя Ей Мария». Она же в велицей
радости услышавши сие возопи: Аллилуиа.

ИКОС 4

Слыша святой и праведный Иоаким, в сие
время в пустыне постивыйся, от тебе, Архангеле
Божий, яко имать со Анною праведною родити
Дщерь предъизбранную от веков в Матерь
Мессии, хотящаго приити на избавление рода
человеческаго, во умилении глубоцем и радости
возопи:

«Радуйся, скорби моя пременителю.

Радуйся, поношения моего в людех отъятелю.

Радуйся, печали моя разрешителю.

Радуйся, Божественныя воли о мне известителю.

Радуйся, всему миру веселие неизреченное сим принесший».

Радуйся, праведных Богоотец Иоакима и Анны сладостнейший утешителю.

Радуйся, великий Архангеле Божий Гаврииле.

КОНДАК 5

Боготечней звезде подобен еси, пречудне Гаврииле, сиянием своим мрак и тьму мира сего пречудно просвещай, и наставляй на путь спасения всех, верою и усердием притекающих к тебе, и дерзновенно поющих Присносущному Солнцу Правды, Христу: Аллилуиа.

ИКОС 5

Видяще тя, Архангеле Божий, провозвестника судеб Божиих и неложного исполнителя Его Святыя воли, рожденная от неплодове Богоотроковица Мария со вниманием и усердием послушаша святых твоих наказаний и с радостью велиею вопияше ти:

«Радуйся, родителей Моих несказанно явлением своим слезы, плач и непрестающую о безчадии скорбь утоливший.

Радуйся, Ангеле мирный и добрый хранителю от Бога Ми данный.

Радуйся, от первых дней Рождества Моего на охранение Ми ниспосланный».

Радуйся, Девы Богоотроковицы во дни детства
Ея и юности охранителю.

Радуйся, правья веры и богопочитания
насадителю.

Радуйся, всем восхваляющим тя верный
защитителю.

Радуйся, великий Архангеле Божий Гаврииле.

КОНДАК 6

Проповедника покаяния и преславнаго
Предтечи Господня Иоанна рождество ты,
всемудре Гаврииле, возвещая родителю его
Захарии священнику, не верующу твоему
неложному пророчеству, языка немотою наказал
еси до времени исполнения словес твоих, яже
егда воочию увидевше пачеестественное сбытие
его, возопи чудодействующему тобою Богу:
Аллилуиа.

ИКОС 6

Возсиял еси пречудно славою, Архангеле
Гаврииле, егда предстал еси в Назарете граде,
быв послан от Бога благовестити
Богоотроковице Марии зачатие Сына Божия
осенением и действием Духа Святаго, вопиюще
Ей: «Радуйся, Благодатная, Господь с Тобою,
Благословенна Ты в женах», и мы грешнии
слышаще сию радость велию, тобою

благовестуемую, взываем ти сице:
Радуйся, Адама и Еву, прародителей наших, сим
благовестием неизреченно возрадовавший.
Радуйся, всем праотцам и прародителям рода
человеческого сим провозглашением сбытие того
вожделенного времени, на негоже они с твердым
упованием надеяшася, возвестивый.
Радуйся, вестью о явлении в мир долгожданного
Искупителя рода человеческого всех
патриархов, пророков, ветхозаветных
праведников и подвижников возвеселивый.
Радуйся, воплощение Сына Божия миру
проповедавый.
Радуйся, начало искупления рода человеческого
провозгласивый.
Радуйся, главизну нашего спасения
благовестивый.
Радуйся, великий Архангеле Божий Гаврииле.

КОНДАК 7

Хотящей Пресвятей Деве Марии разумети
слова благостия Архангела Гавриила и
видяще Себе в чистоте, глаголет ему дерзостно:
«Преславнаго твоего гласа неудобоприятельно
души Моей является, безсеменнаго бо зачатия
Рождество како глаголеши, зовый: Аллилуиа».

ИКОС 7

Новую сию и преславную весть о воплощении Сына Божия благовествуя Препоблагословенней и Пречистой Деве Марии, ужасающей и трепещущей, возопил еси, Архангеле: «Не бойся, Мариам, обрела бо еси благодать от Бога; и се зачнеши во чреве, и родиши Сына, и наречеши имя Ему Иисус. Сей будет велий и Сыном Вышняго наречется, и даст Ему Господь Бог Престол Давида отца Его, и воцарится в дому Иаковли во веки, и Царствию Его не будет конца». Сему обетованию и мы, грешнии, внемлюще и о величии и высоте его ужасающеся, взываем к тебе:

Радуйся, посланный во град Назарет проповедати начало и главизну нашего спасения.

Радуйся, благовестивый всемирную радость Благовещения.

Радуйся, небожителю светообразный.

Радуйся, ликов Ангельских сияние и свете пречудный.

Радуйся, в раи Божия неизреченная красоты и доброты ближайший зрителю.

Радуйся, Престола Пресвятыя Троицы умиленнейший предстоятелю.

Радуйся, великий Архангеле Божий Гаврииле.

КОНДАК 8

Странное и пречудное возвешение о рождении Искупителя рода человеческого от Архангела Гавриила слышаще, Пресвятая Дева рече ему: «Како будет сие, идеже мужа не знаю», и отвещав он, рече Ей: «Дух Святый найдет на Тя, и Сила Вышняго осенит Тя; темже и Раждаемое Свято наречется Сын Божий». Слова Твоя, конечно утвердиша Деву Пресвятую, Иже и рече ти: «Се Раба Господня, буди по глаголу Твоему, вопиющей: Аллилуиа».

ИКОС 8

Весь еси в вышних, Гаврииле, Престолу Царя Славы предстояй, не далек еси и от нижних, памятуя и послушая всех взывающих ти сице: Радуйся, предвечных судеб Троических возвестителю.

Радуйся, посланниче Божий и чудес Его предобрый служителю.

Радуйся, о роде человечестем усердный предстателю.

Радуйся, христиан православных защитителю.

Радуйся, егоже вси вернии восхваляют.

Радуйся, о немже вси православнии ликовствуют.

Радуйся, великий Архангеле Божий Гаврииле.

КОНДАК 9

Вси пастыри Вифлеемстии удивишася зело, слышаще благовестие твое, пречудный Архангеле Гаврииле, о рождении Христа Спасителя; и пречудному пению твоему и с тобою прочим воям Небесным сладостно поющим: «Слава в вышних Богу и на земли мир, в человецех благоволение», внемлюще, возопиша Богу: Аллилуиа.

ИКОС 9

Витии многовещанныя много труждаются в восхвалении Тя, Божественный Гаврииле, и твоих благодеяний, яже всегда твориши в мире сем, мы же, аще и вемы немощь нашу, по достоянию восхваляти тя дерзаем, вопиюще ти сице:

Радуйся, пастырей Вифлеемских обрадовавый. Радуйся, извещением о Родившемся Спасителе мира несказанно их возвеселивый.

Радуйся, со множеством Ангелов в ту ночь Родившагося Сына Божия воспевший.

Радуйся, кротким и смиренным пастырем первым от всех человек Рождение Христа возвестивый.

Радуйся, смиренных, кротких и невысокомудрствующих рабов Божиих любящий.

Радуйся, всегда готовый их послушати.
Радуйся, великий Архангеле Божий Гаврииле.

КОНДАК 10

Спасти хотя мир и искупити его от греха,
проклятия и смерти, Господь наш Иисус Христос
в ночь, в нюже предаешся, пребывая на
молитве в вертограде Гефсиманстем и молящся
до пота кровава, от тебе, Гаврииле, укрепляшся
в подвизе сем, ибо ты еси воистинну крепость
Божия, и укрепляеши в подвизех христианских
всех вопиющих: Аллилуиа.

ИКОС 10

Стена еси, Гаврииле пречудне, святым женам
Мироносицам, егда они свитающе во едину от
суббот пришедше на гроб, носящи мира и яже
уготоваша, и, не обретше телесе Господа Иисуса,
быша во ужасе и скорби велицей о
Возлюбленном Учителе их. И се ты рекл еси
женам: «Не бойтесь вы, вем бо, яко Иисуса
Распятого ищите. Несть zde, восста бо, якоже
рече: приидите, видите место, идеже лежа
Господь», они же обрадовани бывше словесем
твоим, Архангеле, возопиша ти тако:
Радуйся, светлыя и радостныя вести о
Воскресении Христове первый благовестителю.
Радуйся, о победе Христовой над смертью и

адам сладкогласнейший возвестителю.

Радуйся, снизшедый в трусе велием с Небесе, к Живоносному Гробу.

Радуйся, отваливый камень гробный запечатанный.

Радуйся, зраком Твоим молниеобразным стрегущих устрашивый.

Радуйся, Создателю твоему и Владыце Господу, самовластно и пречудно Воскресшему, послуживый.

Радуйся, великий Архангеле Божий Гаврииле.

КОНДАК 11

Пение хвалебное приносим ти, Архангеле Божий Гаврииле. Ты же, яко скоропредстательный наш защитник и ко всякому благу наставник, покрый нас кровом крил твоих, отжени от нас, грешных, духов злобы поднебесных и сохрани от наветов и клеветы злых человек, всех, вопиющих о тебе Богу: Аллилуиа.

ИКОС 11

Светоносный служитель и благодатный вестниче воли Божественной, премудрый Гаврииле, послан был еси паки ко Пречистей Деве Марии рещи Ей о премирном восшествии, сиречь приблизившемся Ея славном Успении, нося ей райское вравие. Она же радостное его

возвешение приемши о преселении в горнее Царствие, вопияше ти тако:

«Радуйся, принесший Ми с Неба целование.

Радуйся, послуживший Ми при Таинстве Боговочеловечения.

Радуйся, паки Ми посланный приуготовитися ко исходу от жизни сея.

Радуйся, возвестителю Божественный о Мне воли Сына Моего и Бога».

Радуйся, честнаго и славнаго Успения Богоматере служителю.

Радуйся, принесший Ей с Небесе радостнаго рая вравие.

Радуйся, великий Архангеле Божий Гаврииле.

КОНДАК 12

Благодать от Бога с Небесе испроси нам, поющим во славу всечестнаго имени твоего, Гаврииле, да осеняеми твоим заступлением, во всяком благочестии и чистоте проживем дондеже, отрешени смертию от уз плоти, сподобимся предстати огнезрачному Престолу Царя Славы и с лики Ангельскими возопити: Аллилуиа.

ИКОС 12

Поюще твой всечестный собор, восхваляем тя, премудрый Архангеле Божий Гаврииле, и молим Господа и Владыку всяческих твоим

предстательством мир миру даровати, Церковь Его Святую утвердити и непоколебиму до скончания века соблюсти, православных же христиан в вере укрепити, поющих ти таковая: Радуйся, многожды в Ветхом Завете спасению человеческому послуживый.

Радуйся, в Новом Завете многократно сему же спасению человеческому потрудивыйся.

Радуйся, добрый нам путеводителю в Горнее Царство.

Радуйся, усерднейший ходатаю нашего спасения.

Радуйся, рода христианскаго великий благодетелю.

Радуйся, страны нашея православныя покровителю.

Радуйся, великий Архангеле Божий Гаврииле.

КОНДАК 13

О, предивный и преславный Архангеле Божий Гаврииле, превечных судеб Божиих возвестителю и усерднейший наш помощниче! Услыши нас приносящих ти сия малыя молитвы и, яко милостив сый, умоли Царя Славы избавитися нам от всех бед, напастей и печали во временней сей жизни; и в будущей, вечней, исходатайствуй шуияго стояния и вечных мук избежати, и сподобитися нам во Царствии

Небеснем пети непрестанно с лики Ангельскими:
Аллилуиа.

(сей Кондак глаголи трижды, посем Икос 1 и
Кондак 1)

МОЛИТВА

О, пречудный Архангеле Божий Гаврииле,
усерднейший молитвенниче о душах наших,
смиренно молим тя, заступника нашего: испроси
святыми твоими всемогущими молитвами пред
Престолом Божиим всегда возносимыми,
(святой храм сей до конца мира сего
сохранити), веру Христову утвердити, укрепити
и расширити, православным христианом
святоотеческую православную веру до конца
дней наших непорочно сохранити, во всех
заповедех Господних неуклонно ходити,
покаяние истинное о гресех наших всегда Богу
приносить, и сподобитися мирныя
христианския кончины и добраго ответа на
Страшнем Суде Божиим. Умоли нам Царствие
Небесное наследовати и вкупе с тобою
прославити Пречестное и Великолепое имя
Пресвятыя Троицы, Отца и Сына и Святаго
Духа, ныне и присно и во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
* НЕБО**